



DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,  
*manè discutienda in Scholis Medicorum, die Jovis decimâ-  
tertiâ mensis Februarii, anno Domini M.DCC.XLIV.*

M. LUDOVICO-CLAUDIO BOURDELIN,  
Antiquo Facultatis Decano, Regiæ Scientiarum Academiæ  
Socio, Chimiæ in Horto Regio Professore, nec non Chi-  
rurgiæ Professore designato, Doctore Medico, Præside.

*An Pulmonum etiam in morbis suis sit Kinæ-Kinæ locus?*

I.



AREM narraret somnio fabulam, si quis uno quolibet remedio unum duntaxat morbum sanari posse affirmaret. Nec de morborum causis medicamentorumque viribus rectè sentiret, qui ab uno eodemque medicamine, nullius non invaletudinis expectaret curationem. Omnibus scilicet morbis, quibus laborat humana gens, eadem non est causa; at nec singulis tamen diversa semper suppetit. Quàm igitur absurdum, immò temerarium est, ægrotationum genus omne iisdem armis debellare aggredi, tam est ridiculum singulas propriis tantum & pe-

A

culiaribus profligare velle. Pluribus sæpe, nunquam omnibus morbis eadem suffecit medicina. Quid mirum autem si compluribus persanandis affectibus par medendi ratio conveniat? Sunt inter morbos plurimi, quos specie magis formæque, quam re & naturâ discriminari, expertus quilibet fateatur. Quorum multis si larvam detraxeris, eandem agnoveris superesse personam. Quid ita? Morbi sæpe non tam causâ quam symptomatis inter se discrepant. Symptomata, ut plurimum, nihil indicant, nisi læsas laborantium partium functiones. En duos ægros quorum hic Plevritide angitur, torquetur ille Nephritide. Eadem utrique morbo sæpe causa est: quæ autem, ut dolorum in utroque ægro, sic in morbo utroque symptomatum diversitas? Non aliundè tamen repetendâ, quàm à diversis plevræ renumque naturâ & functionibus. Qui nimirum coriaceâ turgidus lymphâ sanguis plevræ vicinasque plevræ partes inflammat, idem, si ad renes irruerit, inibi que moram, datâ quâlibet occasione traxerit, eos non dispare deuret incendio. Vides, in discrepantibus morbis, parem causam, dissimilia omnino symptomata. Qui igitur plevræ vasis impactus humor, continuam febrem, acutum pungentemque lateris dolorem, tussim ferè perpetuam, difficilemque adeò facit respiratorem, ut spirandi propè metum inferat, idem, sanguiferis renum tubulis cuneatus infixusque, non solum dolorem ardentissimum, non continuam tantum febrem, familiarem inflammationis ejuslibet comitatum, sed imminutâ tum secernendâ tum excernendâ urinae, coloratoris modò, modò decoloris, copiâ, consentientis cum rene, & illius malum participantis ventriculi languorem, ructum, nauseam, bibulosum vomitum & alia accersit symptomata, quæ languentem læsamque renis functionem indicant. An idcirco tamen curationem diversam iis morbi exposcunt, quòd diversis se signis faciant manifestos? Minimè gentium. An non utrique huic morbo eadem remedia opem ferunt, phlebotomia, diluentia, emollientia, oleosa, narcotica etiam, quam serò & cautè, tam opportunè & feliciter collocanda? An non etiam in utroque morbo, par imminet à præmaturâ purgatione periculum? Est contra ubi similes externâ facie, primoque aspectu, morbi, causâ autem *penique* immane quantum dissimiles, curationis paritatem omnino respuant. Sint in exemplum tres illæ Colicæ species quarum hanc vocant Biliosam, utrique sexui communem, illam Plumbeam nominant, plumbariis artificibus quàm frequentem, tam funestam, tertiam demum, feminis peculiarem, Hystericam nuncupant, ab immortalis apud Medicos memoriæ Sydenhamio ad verum expressam primum, primum etiam congruâ & breviori methodo curatam sanaturamque. Easdem, non rarò, partes obsidet triplex hæc pestis; in eadem sæpe partes acerbissimi doloris cruciatibus defevit; ex eadem sæpe parte, stomacho videlicet, viridum humorum eluviem, enormibus suprà fidem vomitibus eliminat. Quàm dispar tamen triplicis hujus colici doloris curatio! Biliosam Colicam iteratâ venæ sectione, largo diluentium infra supràque adhibitorum, mitorumque deinde purgationum, usu sanaveris. Plumbeam Colicam, frustra usurpatâ & nihil proficiente horum remedium inermi blanditiâ & mollitudine, drasticorum purgantium, vomitoriorumque medicaminum, & è colocynthide paratorum clysterum *morbicâ* vi, intercalato tamen anodyno solamine, citò tutòque sanaveris. Colicam hystericam efficacè hoc purgandi genere exasperaveris, soloque opio in principiis exhibito, totam impleveris curationis paginam. Sic inter se dissentiant aliquando symptomatis, qui causis consentiunt affectus: sic facie similes, moribus sæpe differunt morbi, fictoque & simulato vultu fallunt incautos. Vis tibi non imponat morbus? Respice quidem symptomata, sedulus autem attende ad causam: & quod remediû genus hæc poscere videbitur, id confidenter adhibe, popularis æquè securus auræ, ac vacuus vulgi præjudiciorum, Quorsum autem hæc, inquires; ut scilicet iis in morbis, in quibus eo-

dem vitio laborat sanguis, eadem ægris remedia porrigere aliquando non dubites. Porro ea est affectuum Pulmonis plurimorum indoles, ut à frequentissimâ & maxime solemnî morborum causâ, sanguinis videlicet humorumque lentore ac spissitudine pendeant.

# I I.

**PLETHORÆ**, & à plethorâ oriundæ humorum spissitudini pulmonem præ cæteris corporis partibus patere, ipsius structura indicat. Idem evincit morborum, quibus viscus illud obnoxium est, natura. Pulmonem ita fabrefecit summus opifex ut & sibi, & corpori reliquo provideret. Qui toti corpori fovendo & refarciendo impendi debet sanguis, totus ille in pulmonis officinâ miscetur, cuditur, elaboratur, paratur ad nutritionem. Pulmonis autem ministerio id officii exequenti Naturæ, quàm numerosi se offerunt obices, quàm multiplex indigentia & tarditatis occasio! Sive enim organi vasorum multitudinem, angulos, curvaturas, anfractus exilitatemque spectes, & veliculæ cujuscunque superficiem coronans, capillaremque æmulantibus tenuitatem arteriis & venis intextum, rete, sive liquoris, à cordis anthliâ recentis crudique adhuc, parùm subactam molem, concretioni pronam, & per eos tamen capillaceos vasorum ductus atque circuitus, à pulmonis officinâ ad cordis alveum deferendam, fateri debere pulmonem, si quam aliam corporis partem, cæteriis Plethoræ malis esse patentissimum. His Plethoræ spissitudinisque occasionibus, quas offert pulmonis structura, fovet sanguis ad eum delati indoles, arcet tamen aeris gravis & elastici beneficium, si addideris ejusdem aeris, quolibet peccantis excessu vel defectu, pravas qualitates ineluctabili necessitate in visceris delicatissimi texturam impingere, pulmonis fabricam tandiu perstare incolumem mirabere. Jam autem quid indicant, qui pulmonem affligunt familiariter, morbi, nisi oppletum spissiore sanguine & lymphâ tenaciore viscus nobilissimum? Quid arguit, Asthmatis illa species cui humidum nomen Medici indidère, nisi distentos sanguine redundanti, infarctosque glutinosiore lymphâ pulmones? Quid demonstrat, frequentens adeo hysteris mulieribus virisque hypochondriacis Dyspnœæ species, tardantia vel exhausto menstruorum, hæmorrhoidumve fluxui, ut plurimum, succedere solita, nisi gementem sub copiosioris spissiorisque sanguinis sarcinâ & pondere pulmonis compagem? In Peripneumoniâ, quis, si non corporis totius, at particularem saltém pulmonis plethoram, ejusdemque ingurgitationem non agnovit? Quis, vel inspectis tantummodo ægri, hoc laborantis morbo, sputis sanguine lymphâque commixtis, & lineæ glutine tenaci indurantibus, humoris utriusque redundantiam & tenacitatem, ac proinde spissitudinem, non intellexerit? Ac, ne universam pulmonis morborum familiam recenseamus, Hæmoptysis, quam à sputo cruento, scrupulosius forsitan quàm verius, non infimæ tamen notæ scriptores Medici distinxere, unde oritur ut plurimum nisi ab exuperante crassioris sanguinis copiâ, è distentis nimio cruore, tantoque oneri sustinendo imparibus, & tandem disruptis pulmonum vasis erumpente. Rem ita se habere testatur ipsa Hæmoptysis, suppressæ solemnî alicui evacuationi sanguineæ superstes, aut imminens ejusdem, statisque in limine prænuntia. Sic puellis menstrua diutius frustra expectantibus, non infrequens est Hæmoptysis; sic, maturius æquo cessantem, eandem menstruam purgationem, idem interdum excipit morbus. Qui lege pari, nec dispare periculo, viros etiam exercet, post suppressas, quæ statim temporibus, nec raro uno quoque mense, fluere antea solebant, Hæmorrhoides: maxime, si salutarem hunc effluxum, & ideo necessarium, quia assuetum, uberius aliquod aliud vicariumque effluvium non suppleverit. Porro sive non erumpentis, sive siccati duplicis hujus effluvi, ut effectus est sanguinis ad pulmonum vasa regurgitantis impetus, ac per disrupta

eadem prorumpens Hæmoptysis, sic causam illius persæpe esse purpurei laticis diathesim crassiores, nemo est qui non fateatur. Nec enim, nisi sistendo, vasa per-rumpit redundans cruor, nec sistit, ruptor vasorum, sanguis, nisi factus spissior; conspirante præsertim ad id negotiū, manumque ut ita dicam præbente, nimia va-sorum laxitate.

### III.

HUIC sanguinis humorumque vitio, ac proinde frequentissimæ Pulmonis, ut & reli-qui corporis, morborum causæ occurrere vis & mederi? Ea seligere Medicamina quæ humoribus fluiditatem & obsequentiam, vasīs vigorem roburque restituant. Hujus ef-ficaciæ plurima in attenuantium medicamentorum classe reperias. Quæ inter non ulti-mo loco sedet Kina Kina, novi orbis sæctus dicam an munus, ac si beneficentissimi corticis usum multiplicem spectes, Americano auro longè pretiosior thesaurus. In re medicā peregrinus esset qui febri tantummodo curandæ corticem Peruvianum con-venire existimaret. In eā videlicet, morborumiliade quibus torquentur miseri morta-les, promptius expedieris, quos non sanet, quàm quibus medeatur. Paucos enim repe-rias quorum in decursu usurpari non possit feliciter, pauciores quibus inutilis omnino sit, paucissimos quorum curationi adversetur. Exceptis Febribus ardentibus, iisque, in quibus sanguis acrior solutioque densari potius & compesci, quàm attenuari & moveri exoptulat, vix ullæ sunt, quibus in curandis, vel *febrisfugis*, vel alterantis, vel diaphoretici remedii nomine, opem non ferat. His tamen angustis adeo non clau-ditur limitibus beneficentissimi corticis efficacia, quæ pluribus aliis multiformibus que morbis non infeliciter potest adhiberi. Laborat etenim crudis glutinosisque hu-moribus ventriculus? Ructu flatuque distenditur? Uritur acoribus? Habes in discus-siente Kinā Kinā crudorum coctorem, contritorem glutinosorum, expulso-rem fla-tuum, acidorum domitorem. Laxior imbecilliorque stomachus ingesta alimenta vix versat, nedum terat? Habes in astringentiā Kinā Kinā vi, unde visceris fibras laxiores tendas, infirmas robores, languentes excitare valeas. Uteri vasa distendente tantum, nondum referante tardo pigroque sanguine, lentam febrem, Picam, mille morbos patitur, pallet, adulta jam virgo, nuptiisque, fluerent menses, matura? Cessantibus repente *Catamenii* languet mulier hysterica, omnium fere morborum larvis monstris-que terretur & torquetur? Habebunt ambæ in Kinā Kinā attenuante, sanguinemque rarefaciente virtute, & præsentibus malis remedium, & fortè recrudescentibus reci-divisque Antidotum. Jam & Cachexiæ, multiplicis sæpe Hydropis quàm sæcundæ tam formidandæ parenti, præoccupandæ vel sanandæ utilissimum esse Peruvianum corticem soli nesciunt, qui Cachexiæ causam in primis, ut aiunt, viis, chylique in-digesti, & ad partium corporis nutritionem inepti crassitudine sæpe quærendam esse ignorant. Scorbutum non tam morbum unum esse, quàm in unius ægri perniciem coequentium conspirantiumque morborum *syndromen* verè dixeris: at emendatis tamen chyli cruditatibus, corroboratis digestionis organis, subactō defæcatoque impuro & grumescenti scorbuticorum sanguine, extirpatis, quæ Scorbutum comitari solent va-riis febribus, funditusque deletis innumeris aliis pessimi morbi symptomatis, in de-bellandā centipede Scorbuti belluā, opem sæpe tulit Kina Kina præsentissimam. Et quasi parum esset, adversus tot mala proficuum esse corticem Peruvianum, en emo-rientes Gangrænā artus, saluteri medicaminis præsidio, sanitati redditū, reviviscunt. En potentissimi remedii imperio parent, jugumque aliquando subeunt & ipsæ Va-riolæ, doli & fallaciæ plenum insidumque pestis genus, & Matribus propè nes-cias, an Medicis magis detestatæ. Quidni autem adversus Pulmonum morbos ab humorum crassitudine oriundos efficax esset cortex Peruvianus, qui tot sanguini in aliis corporis partibus spissitudine & morā peccanti, importat bona.



**P**ULMONIBUS infensum esse corricem Peruvianum vetus est, & ipsi prope coeœva cortici querela. Hoc clamant optimates, garrit plebs, effutiant clinicæ mulierculæ, & nisi medicus, nemo fere quasi è tripode non pronuntiat. Si de sumendo Kina Kina agitur, debilem pulmonum compagem excusat ille, hic medicaminis igneam vim inculcat, stypticam iste Kina Kina virtutem damnat, noxiam delicatula pulmonum fabricæ acrimoniam alius criminatur: atque dum infonti medicamini diversa diversi quàm falsò, tam injuriâ, exprobrant, in eo ferè consentiunt omnes, ut saluberrimum, plurimisque debellandis morbis convenientissimum, remedium tantum non abominentur. Posito tamen rectè calculo, non adeò formidandum esse corticem Peruvianum, & in eo vituperando atque infamando judicii minus, quàm præjudicii, plùsque insanix quàm rationis esse reperias. Iis enim, quæ diximus, præstandis, minuenda pendunt sanguinis & humorum spissitudini, ac proinde levandis sanandisque, indè pendentibus, pulmonum plurimis morbis, aptissimum esse corticem Peruvianum probant rectè intellecta hujus medicaminis nativa compositio, & ejusdem in viventis animalis sanguinem actio & effectus. Quæ considerationem merentur componententes Kinam Kinam partes, tres precipuæ sunt; Salina, quæ acidæ indolis, Resinosa, & Terreæ, quæ styptica astringensque est. Has ita sapienter inter se mixtas voluit providus medicamentorum dispensator Deus, ut alteram altera temperaret. Resinosæ partis acrimoniam caliditatemque mitigat & demulcet Acidi refrigerantis focitias. Terreæ stypticæque portionis rigiditatem non tam infringit, quàm obscurat quodammodo & emollit Resinæ, oleosum & exile, rarumque adeò velamen, ut per tenuissimam illius texturam pateat adhuc astringenti Terræ, sed obtusior molliorque, in fibrâ nerveam, impressio. Ex iis sic se invicem temperantibus, partibus, constat totum, nec aciditate, nec acrimoniâ, nec astringente austeritate metuendum. Partis resinosæ officium est, sanguinem attenuare, dividere, concitare. Illud enim habet cum omnibus ferè amaris medicaminibus, amarus ipse, cortex Peruvianus, quòd rarefacti sanguinis momentum intendat, pigro tardoque eidem latici, minimis in vasis & à corde remotissimis hærenti & quasi torpenti, calcar addat. At nec otiosa interim est styptica astringensque Kina Kina Terra; Quæ, quantum sanguini, ab oleoso principio, accedit rarecentiæ, tantum vasis, hac sanguinis rarefactione dilatatis & expansis, roboris *elastici* viriumque impertit ad resiliendum. Quid valeat ad attenuandum sanguinem, promovendumque ejus circuitum Kina Kina, testis est, hujus ope corticis, sanata quælibet Febris intermittens, Febris Causam, Paroxysmos & Periodos non aliunde rectius, quàm à spissioris sanguinis, in capillacea vasa, dato certo temporis spatio, congesti copiâ deduxeris. Qui morbus corticis Peruviani efficacix cum cedat, sanguinis lentorem ab hoc, certissimo omnium, *Febrisfugo* emendari palam est. Nec recondita in Kinâ Kinâ attenuantis virtutis luculentissimum testimonium non præbet, in promovendo mensium fluxu, inter medicos nemini non hodie cognita, corticis hujus efficacia. De Kina Kina astringente vi qui dubitat, meminerit ille, quæ sit hujus corticis in confirmandis stomachi fibris potentia. Hanc non ignorant Gurgites illi, suoque nati abdomini Helluones, qui, quò liberalius cœnent & impuniùs, epulis mox opplendum ingurgitandumque ventriculum, stomachici hujus medicaminis subsidio, licet valentes sanique, nec frustra, solent fulcire. At forsan id beneficii Kina Kina caliditatis potius, quàm astringenti *tonicæ*que ejusdem virtutis, imputaveris. Quid? Si ortas à ventriculi intestinorumque laxioribus & imbecillioribus fibris Diarrhæas, quarum scaturiginem nec exhauserat Ippecacuanna, nec interceperat Sima Rouba, nec Absorbentia siccaverant, nec Opio foeta, calida que & Diaphoretica medicamina

in perspirationis sudorisque organa derivare potuerant, soli cortici Peruviano cessisse memoraverimus. An hanc etiam sanationem Kinæ Kinæ caliditati tantum ascripseris? An hoc in opere partem aliquam, imò & maximam, stypticæ medicaminis Terræ tribuendam esse non fatebere? De acido Kinæ Kinæ sale, atque an illud nitrosæ indolis sit an vitriolicæ, an salis marini naturam æmuletur, nihil habemus certi, quod pronuntiare audeamus. Quod enim medicamentum Kinæ Kinæ Sal Essentiale nuncupant & hoc titulo dividentur, illud non tam est Sal, quàm Kinæ Kinæ Extractum, in quo, si ponderis ratio habeatur, Sal primas, medias Resina, ultimas Terra occupat. Cœterum, mixtorum simul horum trium Kinæ Kinæ principiorum, unicuique viribus in sanguinem agentium, ope atque beneficio, sanguini torpido mobilitas, crasso tenuitas, lento fluiditas accedit. Cui stabiliendæ veritati si non fuissecerint quæ ad ejus assertionem attulimus, perita è morborum, Kinâ Kinâ sanari solitorum, naturâ, desumptaque è principiis ipsum corticem componentibus, argumenta, fidem vel invitis, speramus equidem, sensuum testimonium extorquebit. Nec eas à cortice Peruviano in sanguinem inferri dubitabunt alterationes, quas diximus, ac mutationes, qui à corticis Peruviani decocto sanguinis humani serum in fluorem redigi, à vino, cui cortex idem ad saturitatem infusus fuerit, summam sanguini canino, ex arteriâ recenter extracto, fluiditatem & elegantissimum colorem conciliari, ab injecto demum, in jugularem canis venam, forti corticis Peruviani decocto sanguinem ita immutari viderit, ut ex apertis ejusdem animalis, altero post mortem die, venis, non concretus, non ater, non spissus, sed rutilantior, liquidior, & ultra naturalem statum rarus effluerit,

## V.

**S**ED esto, inquires, sua concedatur Kinæ Kinæ in attenuando sanguine potentia; sua superfit, febrium certissimo debellatori, cortici vis astringentia; Quid est tamen his virtutibus, cum illis quos recensuisti Pulmonum morbis? An non Kinæ Kinæ astringentiâ & pungente virtute Asthmatici Dyspnœa exasperabitur? An non, vellecatis Pulmonum fibris, Pulmonarii Tussis sæviet importunius? An non in Peripneumoniâ, distendenti jam plethorico spissoque sanguini pulmonum vasa, si contingat insuper, ab assumpto cortice Peruviano, rarefcentia, certo certius augebitur inflammatio, symptomata exacerbabuntur, ruentque omnia in pejus? An non, rarefacto, à Kinæ Kinæ resinosa portione, motuque donato citatiore, sanguine, atque hinc latius dehiscenibus, quæ rimas tantum duxerant, Pulmonum vasis, sanguinem pleno gutture eructabit, qui prius cruorem filatim tantum extulsiēbat Hæmoptycus? Non carent, quidem pondere hæc argumenta; nec tamen id sunt authoritatis ut iis, hypochondes nostram perimi sentiamus, aut fateamur. Atque, ut singula breviter perstringamus, Asthmatis quidem curationem solo cortice Peruviano absolvi posse, non adeo deliramus, ut speremus. Sufficit nobis, si humido Asthmati non noceat: imò satis est, si emendato per Kinam Kinam chylo, cruditis in sanguine, in humoribus, lymphæque præsertim spissitudinis, quod sane nullus negaverit, occasio præcaveatur. Huic enim curandæ Dyspnœæ, quæ non à vitio pulmonis, sed à menstrui aut hæmorrhoidalis sanguinis in pulmonem refluui impetu & morâ oritur, corticem Peruvianum adhiberi & debere, non est quod demonstramus. Res ipsa loquitur. Tussim quod spectat, est certè quidem Tussis pulmonum morbus; at in sanandâ tamen illâ tussi, quæ à mensium defectu pendet, menses moventia medicamina, atque adeò, præstantissimum inter illa, corticem Peruvianum plurimum posse, si sapias, non ibis inficias. Aliundè verò est ubi in stomacho fomitem ita habeat, quæ pulmones anhelos exercet tussis importunissima, ut non nisi purgantibus stomachicisque medicaminibus radicatus curetur. Quidni & Kinæ Kinæ stoma-

chicorum remedium principi, aut soli, aut purgantibus commisso, cederet? Nec illud agrè concesserimus, exquisitæ & vigenti Peripneumoniæ, quæ Pulmonis ipsius inflammatio est, bene cum cortice Peruviano non convenire. At nec tu, si suffragantem habere velis experientiam, negaveris, in hac remittente vel intermittente Febre, quæ Peripneumoniæ aliquando succedit, & Empyema vel Pulmonis exulcerationem comitatur, corticem Peruvianum, nec semel, nec sine successu fuisse usurpatum. Ac ne Phthisicis quidem saluberrimo hoc cortice ita interdictum volumus, ut eos aut non laudemus, aut non imitemur expertissimos medicos, qui pellimâ & insanabili Tabæ laborantibus, sive firmando stomacho & juvandæ alimentorum coctioni, sive huic minuendæ, quæ non rarò post assumptum cibum increbescit, febriculæ corticis Peruviani tantillum, identidemque indulgere non dubitant, congruis morbo remediis mixtum atque temperatum. Nec si non audebunt, extinctâ propè declinantis Peripneumoniæ inflammatione, Kinam Kinam, ægro, si res ita postulerit, propinare, qui, flammante eodem morbo, confutum è *Regulinis Antimonii* partibus, sulphure & sale *alkali* acerrimo *Kermes* minerale, calidissimum sanè igneumque medicamentum, sic suadente tamen, magistrâ rerum experientiâ, votisque respondente successu, præscribere ægris non metuunt. De Hæmoptysi, quæstio facile dirimetur, si morbi duplicem esse causam perpenderit. Aliam nimirum Hæmoptysim facit sanguis acrior solutiorque, aliam crassior & grumosior. Hic tubulos suos mole rumpit & impetu; ille, vasa, acrimoniâ erodente lacerat. In primâ Hæmoptyseos specie curandâ Kinæ Kinæ usum damnamus, proscribimus: in secundâ, laudamus, præscribimus, Phlebotomiâque præparato ritè ægro, præmissisque convenientibus remediis, utilissimum judicamus atque commendamus. Hypothesi negas fidem? Credas observationi. Brevis erit, & ad veritatis amussim exacta narratio. Saviebat, quatuor sunt anni, Febris *Catarrhalis* species quædam Pleuritidis modò, modò Peripneumoniæ æmula. A rigore & horrore Tragediam, ut forè solet in acutis, ordiebatur morbus. Mox ingruebat calor ardens, ægra respiratio, vehemens & crebra tussis, non rarus aut levis lateris dolor, glutinosus, nec expers sanguinis spurum, cæteraque Pulmonis inflammati signa & mala. Ab acuto, qui sæpè ægrum pungebat, lateris dolore, Pleuritidem, à sputo, sanguine & lymphâ tenaci commisso, quod inter dolores & anhelitus emoliebatur æger, Peripneumoniam, ab utroque conjunctim ingruente symptomate, quod non rarum, Plevro-Peripneumoniam dixisses. Recrudescabant mala hæc, reduce singulis diebus, statisque nonnunquam horis, Paroxysmo, decedente remittebant. Redituræ febris accessionem rigor rarus præcurrebat, sæpè nullus: isque, ubi sortè aderat, levis adedò, ut nisi iterum atque iterum & enixè interrogatus æger, de eo non fuerit conqueustus. His fugandis symptomatis frustra fuerant oleosa, amygdalata, incrassantia Bechica medicamina, & quidquid emollientis atque anodynî ministrat Medicinæ Pharmacia. Ipsa, etiam octies & amplius celebrata, venæ sectio non tam retundere febris impetum, morbique exarmare ferociam, quàm ægrotantis vires imminuere & exhaustire videbatur. Donec tandem parum felix remedium successus, præsertimque periodicè recurrentis febris accessus de propinando Peruviani corticis decocto nos admonuerit. Dissuadente igitur primo licet aspectu morbi, renuente ægro, reclamantibusque astantibus, Kinam Kinam ausi fumus adhibere. Nec nos audaciæ poenituit. Beneficentissimi nimirum corticis in continuâ hujus febris remissione, singulo quoque die usurpati auxilio, brevè mutari rerum facies, temperari paulatim calor, tussis imminui & evanescere, lateris pungens dolor hebescere & sedari, eruentata sputa concoqui & albescere, morbus gradatim decrescere, nullus non æger convalescere. Hanc autem insoliti & contumacis, Pulmonemque obsidentis, morbi sanationem, quis Kinæ Kinæ, Polychrestî sanè medicaminis, attenuanti & roboranti,

8

ipsisque etiam Pulmonibus, nec raro, salutiferæ, virtuti acceptam referri debere,  
nisi vecors & amens, non confitebitur?

*Ergo Pulmonum etiam in morbis suis est Kinæ Kinæ locus.*

DOMINI DOCTORES DISPUTATURI.

*M. Ludovicus-Florentius Bellot,*  
Scholarum Professor.

*M. Henricus-Franciscus Bour-*  
*delin, Rei Herbariæ Professor*  
*designatus.*

*M. Ludovicus de Santeul.*

*M. Joannes de Dieß.*

*M. Antonius-Joannes Daval.*

*M. Emmanuel-Mauritius du*  
*Verney.*

*M. Josephus de Jussieu, à Re-*  
*giâ Scientiarum Academiâ, &*  
*Botanices in horto Regio Professor,*

*M. Robertus-Hubertus Linguct.*

*M. Ludovicus-Claudius Bourde-*  
*lin, Antiquus Facultatis Deca-*  
*nus, Regiæ scientiarum Acade-*  
*mici Socius, in Horto Regio Chi-*  
*mici Professor, & Chirurgiæ*  
*Professor designatus, Alibi*  
*Præses.*

Proponerat Parisiis, PETRUS - ISAAC POISSONNIER;  
Dijionæus, Saluberrimæ Facultatis Medicinæ Parisiensis Baccalaureus,  
A. R. S. H. 1744. à sextâ ad meridiem,